

## Saksprotokoll i 21.01.2020 - hovudutval for kultur, idrett og integrering

Representanten Kollbotn (R) har stilt følgjande spørsmål:

1. Fortener Jernrosa-festivalen i Odda støtte frå Vestland fylke i 2020?
2. I tilfelle ja, kan ein søknad frå Jernrosa-festivalen og andre som treng snarlege avklaringar for å kunne gjennomføre planlagte arrangement i 1. halvår 2020, få ekstraordinær politisk handsaming, t.d. på neste utvalsmøte?

### Svar frå utvalsleiar for kultur, idrett og integrering:

Utvalsleiar meiner at det første spørsmålet er noko vanskeleg å svare på. Det er eit lada spørsmål i ei sak om stønad til ei organisasjon som har felt mellom to stolar etter fylkessamanslåinga, slik utvalsleiar forstår det. Men, utan at utvalsleiar forskotterer resultatet i saka, er Jernrosa-festivalen ein av mange arrangement eller prosjekt som etter min mening fortener støtte.

Men det er i denne saka klart at tiltaket har falt mellom to stolar. Det gjer at nokon organisasjonar som har arrangement tidleg på året, ikkje får støtte sjølv om den ville falt inn under retningslinene til stønadsordningar som blir vedteke i Vestland fylkeskommune.

Utvalsleiar rår utvalet til å følgje alminnelig prosedyre, ved at det ikkje blir gjort ei ekstraordinær handsaming av denne søknaden. Det handlar om at alle organisasjonar skal sjåast saman i ei heilskapleg vurdering og at utvalet sikrar likehandsaming av alle organisasjonar som oppfyller vilkåra til ordningane vi vedtek.

Ei løysing for Jernrosa, og andre tiltak som er råka av fylkessamanslåinga, er at dei søker etter dei fristane som er, og eventuelt blir, vedteke av utvalet. Så er det opp til utvalet om det ønskjer å gje stønad til eit prosjekt som er ferdig. Det kan fortsatt være viktig med stønad i etterkant.

### Svar frå fylkesdirektør for kultur, idrett og inkludering:

For å ivareta god forvaltningsskikk vil Fylkesdirektør på det sterkaste rå frå å gå utanfor dei vedtekne tilskotsordningane og retningslinene for desse.

Hordaland fylkeskommune, kultur- og idrettsavdelinga hadde ein rettleiar for tilskotsforvaltning. Den ligg no til omarbeiding for å gjelde Vestland fylkeskommune, og skal etter planen leggast fram for fylkestinget i mars. Overordna prinsipp for denne er omsynet til god forvaltningsskikk. For å m.a. ivareta denne og m.a. likskapsprinsippet skal midlar tildelast gjennom ålment utlyste tilskotsordningar med vedtekne retningsliner. Retningslinene skal elles bidra til å sikra ei føremålstenleg og effektiv forvaltning av tilskotsmidlar. God forvaltningsskikk inneber ei sikring av ulike prinsipp, som til dømes at prinsippet om forsvarlegheit og saklegheit vert gjennomført, samt at vilkårlege avgjerder, sterkt urimelege avgjerder eller usaklege avgjerder vert unngått.

Når det gjeld spørsmål 1: Dette er eit spørsmål som må takast stilling til når ein ser ein søknad opp mot retningslinene for ei spesifikk ordning. Elles kan ein ut i frå tidlegare tildelingar sjå at Jernrosa har vore vurdert til å regional kulturverdi.

Det vil i dette møte i hovudutvalet bli lagt fram retningsliner for tilskotsordning for prosjekt og tiltak. Denne ordninga vil i stor grad m.a. erstatte dei tidlegare ordningane Prosjekttilskot: kunst og kultur - profesjonell og Prosjekttilskot: større kulturtiltak. Jernrosafestivalen har tidlegare fått støtte frå desse. Desse ordningane har tidlegare hatt søknadsfrist 1. mars og 1.september, og om retningslinene vert vedteke i møtet i dag satsar vi på å ha frist 1. april. Ut frå dette ser ikkje fylkesdirektøren at Jernrosa - eller andre arrangørar - vil få særleg andre vilkår denne våren i forhold til tidlegare.

Det har vore svært mange søkjarar til dei nemnte prosjekttilskotsordningane, og ikkje tilstrekkeleg med midlar. Mange søkjarar som i prinsippet er verdig tilskot når ikkje opp til å verte prioritert. HFK og VLFK har motteke fleire henvendingar frå ulike aktørar som skal ha tiltak og arrangement våren 2020 og som ventar på utlysing av VLFK sine tilskotsordningar. Det er difor særleg viktig å halde på likskapsprinsippet med utlysing av opne tilskotsordningar og transparens her.

